



Inatsisartuni ilaasortaq Mikivsuk Thomassen, Inuit Ataqatigiit

Inissaaleqineq pillugu § 37 naapertorlugu apeqquteqaammut 2018-223-imut akissut

12-09-2018

Suliaq nr.: 2018 - 17523

Id nr. 33153774

Asasara Mikivsuk Thomassen

Postboks 909

3900 Nuuk

Tlf.: (+299) 34 50 00

E-mail: box909@nanaq.gl

Fax: (+299) 34 63 56

www.naalakkersuisut.gl

Apeqqut 1: Naalakkersuisut nunarput ataatsimut isigalugu inissaaleqinermut periusissiorissamik pilersaaruteqarpat?

Akissut: Naalakkersuisut ineqarnermik aaqqissusseqqinnermik annertunerusumik suliaqarput. Ineqarnermik aaqqissusseqqinnermi innuttaasut inissianik imminnut pilersornissaat ajornanginnerulersinnejassaaq, kiisalu innuttaasut pisortat inissiataannik attartortittakkanik pisariaqartitsisut inissianik attartortittakkanik atuisinnaanerat ingerlaannassaaq.

Kingullermik piginneqatigiilluni inissiaatit pillugit Inatsisartut inatsisaat nr. 33, 23. november 2017-imeersoq aamma inissianik aningaasalersuisarneq pillugu Inatsisartut inatsisaat nr. 39, 23. november 2017-imeersoq akuerineqarput. Naalakkersuisut 2018-imi ukiakkut ataatsimiinnissamut illunut sanaqataaffiusunut taarsigassarsarisarneq pillugu Inatsisartut inatsisissaattut siunnersummut saqqummiussippu. Aamma ineqarnermik aaqqissusseqqinnissamut atatillugu attartortitsisarneq pillugu inatsimmik nutaamik suliaqartoqassaaq.

Aamma Naalakkersuisut Namminersorlutik Oqartussat inissiataannut pilersaarummik suliaqarput, maannalu kommunit inissiataannut pilersaarummik kommunit suliaqarnissaat saqqummiussinissaallu utaqqineqarpoq. Taakku suliarineqareeriarpata sumiiffiit ataasiakkaarlugit ataatsimoortumik pilersaarusoqarsinnaalissaq.

Apeqqut 2: Naalakkersuisut illoqarfikkaartumik inissaaleqineq pillugu annikillisaanissamik qanoq pilersaaruteqarpat?

Akissut: Ineqarnermik aaqqissusseqqinnermi piginneqatigiilluni inissianik aamma inissianut aningaasalersuisarnermi taarsigassarsilluni inissianik sanaartornissamut periarfissat pitsaanerulissapput. Tamatumani pingaartumik illoqarfiiit najugaqarfiillu minnerit pineqarput, taakkununnga illoqarfinnut annerusunut sanilliullugu amerlanerusunik taarsigassarsisoqarsinnaalerluni. Tamatuma saniatigut illunut sanaqataaffiusunut taarsigassarsitsisarneq pillugu inatsisissatut siunnersuut innuttaasut inissianik imminnut pilersorsinnaanissaannut periarfissanik pitsaanerulersitsissaq.

**Apeqqut 3: Naalakkersuisut nunatsinni inissaaleqineq akiorniarlugu
sanaartornikkut qanoq pilersaaruteqarpat?**

Akissut: Apeqqut 1-imut aamma 2-mut akissutit takukkit.

Neriuppunga qulaani allaqqasuni apeqquteqaatitit akineqartut.

Inussiarnersumik inuuillaqqusillunga


Simon Simonsen